



*Selasa, 09 Maret 2021*

**Ogen: Yesaya 41:10-13**



**“Beneken Aru Ate”**



Ibas pandemi Covid 19 enda ertambah-tambah kiniseran nderpa manusia. Mulai kin masalah kesehatan, ekonomi, sosial, seh ku masalah kiniteken simenam bene. Ibas situasi enda banci saja kita lupa kerna penampat Dibata ibas krina situasi kegeluhen subuk susah, senang ntah pe mesera. Renungenta wari enda mpersingeti kita gelah ula mbiar, sabap Aku kap ras kam! Aku kap Dibatandu. Labo ipediat Dibata kita mesera, sebab sura-sura Dibata meneken aru ateta.

Sekalak Moria, siperbulangenna mbaru idilo Dibata, tambah ka seminggu dung perbulangenna ibuniken, anaknya sintua kecelakaan ras kritis bas ruang ICU, kenca 2 wari kenca e, anakna singuda pe ipecat ka bas pendahinna. Seh kel sedakna akapna nangkeli perbeben geluhna e. Seh maka, ibas tengah berngi ertoto me ras terbukana me ayat Alkitab bas pustakana sinuriken kerna Jesaya.41:10-13. Sengget kel moria enda ngogesa, emaka tangis ia ras serko, nina man Dibata, Tuhan, beneken aru ateku, kuasai aku sebab lalit simetahat i lebe-lebendu. Terang wari, ibegina me arah perawat nari anaknya sintua ndai nggo sedar ras ngelebu nandena lalap. Meriah kel ukurna sebab tuhu-tuhu bene kearun ate ndai, seminggu ndarat anakna endai arah ruang ICU, datna ka berita anaknya singuda dat dahin ibas perusahaan si cukup terkenal bas kota Medan. Ibas kita erpengendes man Tuhan, bene me aru ate isalihkenna arah pasu-pasuNa simbelin. Bageme penggejapen Moria enda ibas paksana.

Aminna pandemi enda langa erkedungen tapi Tuhan kap ras kita rasa lalap. Beneken aru ate, beneken kebiarenta, megegehlah. Aru ate e erbanca masap kinitekenta, lanai ateta erjuang, emaka benekenlah aru ate alu kataNa. Arus belinen perbahanen Dibata ngkuasai pusuhta asangkan kearun ate. Sabab apai sibelinen, eme singaturken kegeluhen, janah ingetlah labo sitik pe lit untungna mpebelin aru ate.

➤ *Labo sitik pe man asuhen aru ate, petetaplah ukur*